

**Uunga siunnersuut: Sulisoqarnermut akitsuut pillugu Inatsisartut inatsisaata
allanngortinneqarnera pillugu Inatsisartut inatsisaat nr. xx af xx. xxx 2020-meersoq.**

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Aningaasaqarnermut Akileraartarnermullu Ataatsimiititaliap suliarinninnermini ilaasortarai:

Inatsisartunut ilaasortaq Hermann Berthelsen, Siumut, siulittaasoq

Inatsisartunut ilaasortaq Múte B. Egede, Inuit Ataqatigiit, siulittaasup tullia

Inatsisartunut ilaasortaq Karl-Kristian Kruse, Siumut

Inatsisartunut ilaasortaq Malene V. Rasmussen, Demokraatit

Inatsisartunut ilaasortaq Peter Olsen, Inuit Ataqatigiit

Inatsisartunut ilaasortaq Jens Napaattoq, Partii Naleraq

Inatsisartunut ilaasortaq Aleqa Hammond, Nunatta Qitornai

UKA 2020-imi ulloq 7. oktober siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Siunnersuut una naartunermi, erninermi meeravissartaarnermilu sulinngiffeqartarneq ullormusiaqartarnerlu pillugit Inatsisartut inatsisissaattut siunnersuummut peqatigitillugu saqqummiunneqartumut atatillugu isigineqassaaq (UKA 2020/183). Namminersorlutik suliffeqarfiutilinnut atatillugu erninermi aningaasaateqarfik naligiissaarinnermut aningaasaateqarfiussaaq assigiimmik pisussaaffeqarfiulluni erninermut atatillugu sulinngiffeqarnermi akissarsianut aningaasartuutit namminersorlutik sulisitsisut tamarmiusut akornanni naligiinnerusumik agguataarneqarnissaannik qulakkeerinnittoq. Namminersorlutik sulisitsisut erninermut atatillugu il.il. sulinngiffeqartut akissarsiaannut aningaasartuuteqartut aningaasartuutimik taakku ilaat erninermi aningaasaateqarfimmit utertissinnaassavaat.

Sulisoqarnermut akitsuut pillugu Inatsisartut inatsisaata allanngortinneqarnissaannik siunnersuut una namminersorlutik suliffeqarfiutilinnut atatillugu erninermi aningaasaateqarfiup aningaasalersorneqarnissaannut qulakkeerinneqataassaaq. Namminersorlutik suliffeqarfiutilinnut atatillugu erninermi aningaasaateqarfimmut aningaasartuutit matussuserneqarnissaannut akissarsiat katinnerannit akitsuuteqartitsilernissaq siunnersuutigineqarpoq. Kommunit aamma Namminersorlutik Oqartussat akitsuummik akiliisussaatitaanermi ilaatinneqanngillat. Taamaalilluni allat

sulisoqarnermut akitsuummik akiliisussaatitaasut tamarmik erninermi aningaasaateqarfimmut akitsuummik akiliisalissapput. Akitsuummi tunngavigineqassaaq aningaasarsiat katinneqarnerisa amerlassusiat § 2, imm. 2-4-mi aalajangersarneqartoq malillugu.

Sulisoqarnermut akitsuut pillugu Inatsisartut inatsisaanni § 2, imm. 4-mi aalajangerneqarpoq, soraarnerussutisiaqalernissamut aaqqissuussinernut ilanngaatiginninnissamut pisinnaatitaaffiusunut aalajangersimasunut akiliutinit sulisoqarnermut akitsuummik akiliisoqartassanngitsoq. Taamatut ilaatitsinninnissaq, aamma soraarnerussutisiaqalernissaq siunertaralugu akiliutinit atuutislerlugu, annertusitinneqassasoq siunnersuutigineqarpoq. Taamaaliornermi soraarnerussutisiaqarnissaq siunertaralugu ileqqaarnernut akiliutit,

Siunnersuutip Inatsisartunit siullermeerneqarnera

Oqaatigineqareersutut siunnersuut una naartunermi, erninermi meeravissiartaarnermilu sulingiffeqartarneq pillugu Inatsisartut inatsisissaattut siunnersuummut, suliffeqarnermi namminersortunut erninermit atatillugu sulingiffeqarnermut aningaasaateqarfimmik pilersitsinissamik ilaatigut pingaarnertut siunertaqartumik aammalu siunnersuummut matumunnga peqatigitillugu saqqummiunneqartumut, ataqatigiissillugu isigineqassaaq. Immikkoortoq taanna siullermeerinninnerup aappassaaneerinninnissallu akornanni Ilaqutarinnermut Peqqissutsimullu Ataatsimiititaliamit suliarineqartussanngorlugu innersuunneqarpoq, taamaattumillu Aningaasaqarnermut Akileraartarnermullu Ataatsimiititaliap immikkoortumik matuminnga suliarinninneranut ilanngunneqassanani.

Immikkoortoq matumani pineqartoq partiinit tamanit inersuarmi taperserneqarpoq aammalu Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarluni.

Tusarniaanermut akissutit

Tusarniaaffigineqartut siunnersuummut oqaaseqaataat tiguneqartut Naalakkersuisunit issuaavigineqarlutillu taakkununga oqaaseqaatit allanneqarput. Naalakkersuisut oqaaseqaataat ataatsimiititaliamit tusaatissatut tiguneqarput ataatsimiititaliarlu taakkununga allanik oqaaseqaatissaqanngilaq.

Ataatsimiititaliap siunnersuummik suliarinninnera

Siunnersuutip siunertaa imarisaalu Inatsisartunit tapersersorneqartut ataatsimiititaliamit oqaatigineqassaaq. Tamatuma peqatigisaanik ataatsimiititaliamit oqaatigineqassaaq siunnersuummut matumunnga nangaassuteqanngitsumik tapersersuineq ersersinneqarmat aammalu siullermeerinninnermi oqaaseqaatigineqartut immikkoortoq UKA 2020/183-imut, matumunnga ataqatigiissillugu oqaluserineqartumut, pingaarnertut tunngammata. Siunnersuutip aappassaaneerneqarnissaanut Ilaqutariinnermut Peqqissutsimullu Ataatsimiititaliap isumaliutissiissutaa ataatsimiititaliamit innersuussutigineqassaaq. Ilaqutariinnermut Peqqissutsimullu Ataatsimiititaliap isumaliutissiissummini isiginninnera naliliineralu Aningaasaqarnermut Akileraartarnermullu Ataatsimiititaliamit isumaqatigineqarput. Tamatumani assersuutigalugu pineqarpoq

naatsorsuinermi tunngavigineqartumut uppersaatissanik pissarsisinaannginnermi ajornartorsiummut aaqqiissutissanik pisariaqartitsineq. Ilaqutariit savaatikkormiut kiisalu ilaqutariit aalisartukkut piniartukkullu ataatsimiititaliamit assersuutitut taaneqarput.

Pisortanut aningaasaqarnikkut allaffissornikkullu kingunerisassat.

Tamatuma saniatigut missingersorneqarpoq Namminersorlutik Oqartussat aamma kommunit erninermi aningaasaateqarfimmu ukiumut 21,8 mio. koruunit missaannik akiliisassasut.

Naatsorsuutigineqarpoq Akileraartarnermut Aqutsisoqarfiup IT atorlugu periaasiinik allangortitsineq 1.000.000 koruunit sinnernagit ataasiartumik aningasartuuteqarnermik kinguneqassasoq. Kingusinnerusukku IT atorlugu periaatsip allangortinneqarneranut aningaasartuutit Akileraartarnermut Aqutsisoqarfiup nammeneq killissaasa iluanni akilerneqassapput. Taamaattumik siunnersuut Akileraartarnermut Aqutsisoqarfimmu annikitsuinnarmik allaffissornikkut sunniuteqassanganneqarpoq.

Inuussutissarsiutinik ingerlataqartunut aningaasaqarnikkut allaffissornikkullu kingunerisassat:

Erninermi aningaasaateqarfimmik pilersitsinermi inuussutissarsiortut aningaasarsiat aningaasartaasa 2 promilliata missaannik, 19 mio. koruunit missaannik annertussuseqartunik, sulisitsisunit akiliummik akiliinissamik pisussaaffilerneqassasut naatsorsuutigineqarpoq.

Sulisitsisup erninermi aningaasaateqarfimmu tapeeqataassutinik akiliuteqartarnissaanut atatillugu allaffissornikkut kinguneqassanngilaq, tamanna sulisoqarnermut akitsuut pillugu Inatsisartut inatsisaat malillugu maanna akileeqqusisarnerit assigalugit pisassammat.

Ataatsimiititaliap inassuteqaatai

Siunnersuut **akuerineqassasoq ataatsimiititaliap isumaqatigiittup** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Hermann Berthelsen
siulittaasoq

Múte Bourup Egede
siulittaasup tullia

Karl-Kristian Kruse

Malene V. Rasmussen

Peter Olsen

Jens Napaattoq

Aleqa Hammond